



Optuženi Srpk Pustivuk kazao je pred Sudom BiH da nije učestvovao u napadu na Bošnjake u selu Gornja Bioča, već da je u selo došao na poziv svoje uplašene rodbine koja ga je uputila da krene u pravcu kojim je prošla “nepoznata vojska”.

Pustivuk je, odgovarajući na unakrsna pitanja Državnog tužilaštva, kazao da je zajedno sa dvojicom kolega bio prisutan kada je 29. maja 1992. godine njemu nepoznata vojska opkolila i pucala u kuću njegovog komšije Bošnjaka u selu Gornja Bioča (općina Ilijaš).

Pustivuk je dodao da je na ulazu u kuću vidio vojnika kojeg su ostali oslovljavali sa “Kapetan Zoran” a koji je, prema iskazu optuženog, naredio vojnicima da ubiju zarobljenog mladića. “Čim smo prišli kući, vidjeli smo dvoje ranjene djece i odmah smo pritrčali da im pomognemo. Dok sam mobilisao nogu ranjenoj djevojčici, primijetio sam tog Zorana. Nikada ga poslije nisam vidio”, kazao je Pustivuk, dodavši da policija nije izašla na uviđaj nakon ubistava u selu Gornja Bioča, ali da je on lično napisao službenu zabilješku par dana kasnije.

Tužilaštvo BiH tereti Srpk Pustivuka, bivšeg pripadnika Stanice javne bezbjednosti (SJB) Ilijaš, da je 29. maja 1992. godine, ili približno tog datuma, s drugim pripadnicima vojske i policije Srpske Republike BiH, učestvovao u napadu na civile u selu Gornja Bioča. Tom prilikom su, stoji u optužnici, ubijena dva, a teško ranjena tri civila, od kojih je dvoje bilo maloljetno.

Pustivuk se tereti i da je tokom maja i juna 1992. učestvovao i u nezakonitom zatvaranju civila Bošnjaka, koji su potom pritvarani u logore i druge zatočeničke centre. Optuženi se nalazi u pritvoru od jula 2010. godine.

Pustivuk je tokom unakrsnog ispitivanja istakao da je “pedesetak Bošnjaka iz Gornje Bioče” dobrovoljno došlo u školu radi bezbjednosti, te da je njihovo odvođenje organizirala vojska koja ih je, prema saznanjima optuženog, planirala poslati u razmjenu.

Zoran Božić, član Sudskog Vijeća, upitao je optuženog zašto ranije nije otkrio ko je kriv za ubistva ljudi u selu Gornja Bioča, na šta je Pustivuk kazao da je “pratio upute svog advokata”. Nastavak suđenja zakazan je za 1. novembar 2011. godine, za kada je Sudsko vijeće najavilo saslušanje dodatnog svjedoka.

BIRN Justice report

www.ilijas.ba